

ԱՍՏՂԻԿ ԳԵՎՈՐԳՅԱՆ


ԳՐԵՆԱԿԱՆ ԳՈՐԾԻՔ՝ ԳՆԴԻԿԱՎՈՐ ԳՐԶԻ ՄԱՍԻՆ

Ձեռագրերում հաճախ հանդիպում են գրենական և նկարչական պիտույքներ պատկերող զանազան մանրանկարներ, որտեղ ներկայացված են եղեգնյա գրիչներ, նրանց մշակելու համար գործածվող մկրատներ, դանակներ, ապա թանաքամաններ, ներկամաններ:

Մեր ուշադրությունը գրավել է մի հետաքրքիր գործիք, որը պայմանականորեն կոչում ենք գնդիկավոր գրիչ, որովհետև նրա երկու մասերն իրար միացած են մի սնամեջ գնդիկով: Թանաք պարունակող այս գնդիկից դեպի վերև ծայր է առնում մի երկարավուն ձողիկ, որը գրչի կոթն է, իսկ գնդիկից ներքև իջնող ձողիկի սուր ծայրը ծառայում է որպես գրչածայր:

Առաջին անգամ գնդիկավոր գրչի հանդիպում ենք 1166 թ. Հռոմկլայում գրված մի ավետարանում (ձեռ. № 7347): Այս ձեռագրի 12ր էջում նկարված է Մատթեոս ավետարանիչը, որի մոտ, սեղանի վրա, գրված է շորս գնդիկավոր գրիչ: Նույն ձեռագրում, պատկերված մյուս երեք ավետարանիչների մոտ, դարձյալ հանդիպում ենք այդպիսի գրիչների: Գնդիկավոր գրիչներ պատկերված են նաև № 7737 ձեռագրի (ԺԲ դար) 208ր և 334ր էջերում:

Ուշագրավ է Կիլիկիայի Սկևռա վանքում 1173 թվականին ընդօրինակված՝ Գրիգոր Նարեկացու «Մատենան ողբերգութեան» ձեռագիրը, որի 7ր էջին պատկերված է Նարեկացին՝ գնդիկավոր գրիչը ձեռքին (տես նկ. 1):



Նկ. 1. Հատված № 1568 ձեռագրի 7ր էջի մանրանկարից
(Կիլիկիա, 1173 թ.)

Հիշատակված Կիլիկյան ձեռագրերից հետո, գնդիկավոր գրիչներ հանդիպում ենք 1211 թ. Հաղբատի ավետարանում (էջ 18բ), որը ծաղկել է Մարգա-